

所能卒知而天地有大陽九六百六小陽九
小百六天厄謂之陽九地虧謂之百六此二
災是天地之否泰陰陽之勃蝕大期九千九
百年小期三千三百年而此運所鍾聖主不
能禳至於滅凶遺吉自後快耳夫陽九者天
旱海涌而陸焦百六者海竭而陵崩
右出道迹經

無上秘要卷之七

無上秘要卷之九 第八卷重出今併九八十七卷 叔六

靈官昇降品

高上玉清太真帝皇有犯明科之目退編皇
之錄降道散真皇治太清中官百年隨格進
號

上清真人不勤仙事在局替慢虧廢真任漏
泄寶訣降授非真皆退上真之錄充五嶽都
校之主千年隨格進號

受上元夫人之位元君之號不動帝局虧替
正事降過禮朝晏失節輕泄天寶降授不
真皆削真皇之錄退紫虛之位置於中玄清
微遊散靈官七百年隨勤進號

受太清仙人之號不動典局稽替仙事虧廢
真任或泄露天科傳降非所削真仙之錄退
充五嶽都校主者二十四百年隨勤進號

受五嶽飛仙之號不任政事虧替仙局輕慢
道文退正仙之錄充補三官都校之主二千
四百年隨勤進號

諸受五帝四司三官都校之位不任正局稽
怠虧略替忽天典廢關政事糾罰不當皆削

正真之爵退補都統書吏三千六百年有勤
進號

諸受上真玉札所掌門監玉郎羽仙侍郎上
官典格都統正真領仙侍郎主禁大夫典仙
羽章都官司正各不任其局稽廢正事虧略

天科皆削上真之札責補三官書吏統領鬼
奕七十年有勤者隨善進號
右出四極明科

衆聖會議品

高聖帝君曰正月一日三月三日五月五日
七月七日九月九日十一月十一日此一年
六日是天德值合之時七聖定簡五帝記名
西龜勒錄東華結篇當此之日天元合慶四
司羅兵高上顯蓋玉虛迴軒九帝東帶七聖
齊靈億真萬仙皆浮位金庭三晨翼軒七元
炁明天地潔落十界肅清九天帝玉遣監真
使者高上七聖遣定錄左仙西龜王母命五
老仙伯四皓中真東華青童遠領仙玉郎各
部飛仙挺輪羽騎周行十天五嶽名山陰察
洞元已得道者遊散仙官及後之學人名參

簡錄身未昇騰或女記無名而苦行修勤情
冠王虛上感玉皇諸以學身當此之日清齋
燒香索諸異想願合天心存思苦念修行靈
文為五帝所舉即勅注白簡青錄記名即道
四極下降授以上真當此之日如有輕慢天
寶泄漏玄文身犯七傷為四司所糾有白簡
之日者皆勅落青錄注還鬼官

右出洞真七聖元紀經

- 正月六日日中
- 一月一日晴時
- 三月七日夜半
- 四月九日食時
- 五月十五日夜半
- 六月三日中時
- 七月七日夜半
- 八月四日中時
- 九月二日平旦
- 十月一日平旦
- 十一月六日平旦
- 十二月十三日夜半

此十二日五星中上皇太真道君俱登上清
見九玄太上道君

又千真三十六天帝下連太清飛仙以上普
慶會太極上宮論世上求真之勤漸紀書學
真者之玉名當刻之金闕定書藥簡

右出洞真八素經

元始靈寶五老尊神諸天帝皇妙行真人常
以正月三月五月七月九月十一月一歲六
月會於上上三天靈都宮元陽紫微之臺集
算天元推校運度諸天各下天帝太一使者
日月星宿部三官考召五嶽四瀆河海大神
周行天下莫不糾察功過揀擇種人當此之
月天下地上莫不振肅執齋持戒學奉天真
學者以其月隨科修齋功記三官五帝列名
元始靈寶西北天大聖眾至真尊神无極大
道上帝真皇老人常以月一日上會靈寶玄
都西北玉京山紫微上宮奉齋朝天文校地
上人鬼功過其日勅北斗下與三官考召四
部刺新周行天下糾察兆民條列善惡輕重
上言其日有奉修直齋不犯科律三官除罪

錄列名女都萬神衛護得為種民犯惡為非
移名地官

元始靈寶北天大聖眾至真尊神无極大道
太上老君靈寶妙行真人常以月八日上會
靈寶玄都北上玉京山陰元臺奉齋朝天文
校地上兆民簿錄年命算籍其日勅北斗司
殺鬼下與八極司隸周行天下司察善惡功
過輕重列言其日犯惡為非移付地官執心
奉齋不犯科律三官削除罪名三天記上仙
錄告下天神地祇侍衛營護萬安不干

元始靈寶東北天大聖眾至真尊神妙行真
人无極大道太上萬度萬生神皇无上玄老
君常以月十四日上會靈寶玄都玉京山通
陽清微宮奉齋朝真文校天下學道年月功
過及鬼神之事其日勅太一使者下與北鄭
伯使者周行天地司察人神功過際淡列言
上官有修齋立德即勅錄九天記名仙籍鬼
神隨功進秩人鬼有罪移還鬼府
元始靈寶東天大聖眾至真尊神太清玄元
上三天无極大道无上玄老太上老君太上

丈人皇上老君皇上丈人青靈上真天帝君
 天帝丈人天帝君大帝丈人九老仙都君九
 炁丈人等百千萬重道氣千二百官君太清
 玉陛下東極老人青華大神上相司馬青童
 金闕後聖帝君真陽始青神人靈寶九仙君
 等青和玉女主仙四郎常以月十五日上會
 靈寶太玄都玉京山青華玉陛下奉齋朝天
 文共集校定學仙人名功過深淺其日天帝
 自下日月星宿天上天下地上下五嶽四
 瀆河海神靈莫不慘然俱下周行諸天下地
 上察校學士兆民功過輕重列言青宮其日
 修齋奉戒則五帝保舉上言東華生死為仙
 勅下三界神靈侍衛千灾不干有犯科律移
 付地官
 元始靈寶東南天大聖眾至真尊神无極大
 道南上老君丹靈南極真人太和玉女常以
 月十八日上會靈寶太玄都玉京山洞靈丹
 臺奉齋朝天文集校天民簿錄分別善惡其
 日初天一下周行地上司察兆民功過輕重
 列言靈寶洞靈丹臺其日有修奉靈寶真經

燒香行道齋戒願念不犯科禁則司命勅名
 生錄勅地祇管護福慶日隆萬願如心有違
 科犯禁則除生籍移名鬼官
 元始靈寶南天大聖眾至真尊神无極大道
 南上赤帝丹靈老子太和玉女長生司馬注
 生司命司錄南極度世君萬福君常以月
 二十三日會上會靈寶太玄都玉京山洞靈元
 陽之館奉齋朝天真共集校天民祿命長短
 分別善惡其日初太一八神使者下與三官
 考召周行天下司察天人善惡列言其日有
 修奉靈寶真經燒香行道齋戒願念不犯禁
 忌則司命長生司馬注上生簿廷算益命勅
 下地官管衛祐護別為善民有違科犯戒減
 算縮年
 元始靈寶西南天大聖眾至真尊神无極大
 道天皇老人南極元真君洞陽太靈常以月
 二十四日上會靈寶太玄都玉京朱官共集
 考校三官九府五嶽北鄴太山二十四獄罰
 刑簿目鬼神天人責役輕重之事其日初北
 辰下與三官考召北部勅奸周行天下覆校

諸司兼察萬民善惡列言其日有修奉靈寶
 真經燒香行道執齋持法則北辰列言善功
 上官記名則除罪錄得為種民有違科犯律
 則長充鬼役
 元始靈寶西天大聖眾至真尊神无極大道
 西華金璫玉仙真母金闕後聖上相帝君四
 極真人常以月二十八日上會靈寶太玄都
 玉京山金闕七寶官奉齋朝天真共集推校
 日月星辰分度并得道人名其日初太一下
 歷校天宿周行學人善惡列言其日星宿琬
 珠玉衡皆慘然俱會天闕之門凡為學者能
 修齋奉戒思仙念道太一所舉言名仙簿得
 為種民違科犯法三官所糾長為罪民
 元始靈寶下元天大聖眾至真尊神无極大
 道下元玄黃洞淵洞靈萬仙五帝四司真人
 常以月二十九日上會高皇天太玄都玉京
 黃房奉齋朝天真算校五嶽四瀆河海水帝
 地靈神鬼之事萬民罪簡深重其日遣中太
 一下與三官九府九部刺奸周行五嶽三官
 水府餘正鬼事司人功過罪簡所由輕重列

言其日有奉修靈寶真經燒香行道誦齋奉
戒則為三官九府所係列言善功則除罪簡
上名三天神明衛護千災不干有違科犯禁
移名地官長為罪民

元始靈寶上元天大聖眾至真尊神無極大
道上下中央四面八方太上無為大道諸君
丈人最大至尊無上無嶺無極無窮並照普
察無量洞明最上正真無執數眾道氣無先
家廓無端混沌無形虛無自然太上元根冥
寂玄通大智慧源正一盟威太上無為大道
道中之道神明君無上初元萬億數無執數
道德諸君丈人天地父母神仙所出神仙所
聚東王父西王母日帝月夫人五星真君五
星皇妃璇璣玉衡七星真君眾仙天官大神
等常以月三十日上會靈寶太玄都玉京七
寶紫微宮奉齋朝天真萬帝眾神諸天諸地
普集校算大劫小劫大小百六天地運度料
別善惡學道應得神仙人名其日遣上太一
下太一自下其中諸天星辰日月璇璣北斗
慘然俱下與五帝五嶽四瀆江河淮海水帝

九部判茲三官考召地上神祇周行天下司
察善惡功過輕重列言上天其日有能修奉
靈寶真經修齋奉戒燒香念道為太一所舉
列言善功則名上仙簿勅地神營護有違科
犯戒移付地官長為罪民

凡人本命之日身中吏兵上計功過三天監
察下考得失常以本命日攝齋燒香太一使
者皆錄善功奏上三天上帝則除為監天真
人太玄上宮北帝常以庚申日制天民三尸
魂神餘人罪狀上奏帝君當此日能修齋奉
戒晝夜思神則三尸不得上天言人之罪地
司奏人善功列言帝君太一歡喜即記名左
契長為種民

太玄上宮至真尊神常以甲子日遣太一中
臺天使者下周行諸天地檢校神祇枝散雜
俗鬼神有其日能攝齋燒香中臺天使者皆
條善功奏上三天上帝即除為監天真領地上
鬼神八節之日是上天八會大慶之日也其
日諸天大聖尊神妙行真人莫不上會靈寶
玄都玉京山上官朝慶天真奉戒持齋遊行

誦經各遣天真威神周行天下四海八極五
嶽名山學人及得兆庶糾察功過輕重列言
其日諸星宿日月璇璣地上神祇莫不振肅
凡是修齋持戒宗奉天文皆為五帝所舉上
天又別書名玉曆記為種民告下三官神靈
侍衛門戶整肅萬災不干至學之士三界司
迎神仙度世上為真人為惡犯戒同考所糾
移付地官長為罪民

右出洞玄元始五老赤書玉篇經
無上祕要卷之九